

龍

江

集

龍江先生文集序

近世儒紳先生抱道談藝者無慮數十家乃惟龍江先生之文爲世誦法信而必傳豈非以爾雅溫厚追復古初之盛獨有關於世道與余小子少從先生游習見其文嘗受而讀之竊以爲士之不朽者在是先生命余曰是壯夫之所耻也

予獨何羨乎士當表見於天下者
固不止此也先生嘗所自力在薦
行蹈道求儼古之聖賢不屑以文
藝顯於世故其學務以實踐爲地
取世儒所稱良知之理悉著於躬
行不苟談性命以眩俗其爲文辭
皆根柢六經無詭異辨博新奇之
說而粹然一出於道嗟乎此非所

謂龍江先生之文也哉夫文與氣
運相關蓋自昔記之矣皇古淳龐
完固渾噩之文出焉不期於文而
文至矣後之作者刻意攻文文迺
寢薄豈非以求諸文而不求諸始
乎明興斲珣爲樸復於本始劉
宋諸大家振耀淳風訓世作則自
後楊李揚芬於中葉李何繼興於

近代咸以爾雅溫厚之文宣國
家之盛氣炳如麟如共成一代文
章之體蓋能追蹤古初比隆墳典
焉非單言隻語之釀纖可從而軒
輊也中世獎右浮靡士習益陋經
生不究明指歸馳舛踵殘以幸利
祿文士則湊釘偶儷剽掇故藻爲
容澤此猶不能涉靡曼堂戶烏睹

爾雅溫厚哉先生悼世懷古循軌
邇涼振積衰之運還於古初一時
詭異之習往往嚮風而易慮其有
功世道豈淺鮮哉先生弱冠登朝
大節焜燿忤權堅而不撓亢逆藩
而不屈再罹黜辱瀕於危殆而不
疑文章節義凜凜賈傳宣公之遺
烈乃其中固自有本矣當其督學

江藩獨持大體不尚苛屑之政都
肄諸生得人人自便及評隲臧否
不爽尺寸士有遺思焉會寧藩構
逆先生以不屈被繫卒能乘間返
正奪門以納王師忌者毀其功不
錄顧復蒙之以罪先生終不自明
時時概見于篇什悲夫藉第令無
齟齬於時獲盡其用斯鴻鉅之業

可坐而致寧獨藉文藝自見哉先生性嗜史籍自勝冠至於耄齒口未嘗廢稱說凡士民之賢豪有聲者皆願交親之其樂善詡詡推置自喜誠其中不能自釋也優游林壑餘三十年逡逡醇謹躬孝弟廉讓之節如一日族里化其行幾於還醇矣自非質有其內烏致是哉

雖天靳其施而有文足以爲訓有
子世具君能世其學是役躬親校
讎鬻琴書以命梓忠信嫻懿紹美
後先可謂聲施不窮矣天於盛德
之報豈獨無意其間哉先生官諫
議日奏疏凡若干篇皆論當世大
務今燬不存所存僅僅止此又非
先生所以垂後之意昔陳思王有

言後世誰知訂吾文者夫訂文非
難難於知意耳余於是竊歎先生
之懿輒附知者終其說於簡末云
隆慶三年歲在己巳季夏望日
賜進士出身尚寶司司丞後學顧
名世頓首撰

明故中憲大夫江西按察司提學副使唐公墓誌
銘

賜進士及第資政大夫南京吏部尚書致仕前翰
林院侍讀學士

經筵講官兼脩 國史睢陽朱希周撰

唐之先系出晉陽爲宋御史中丞子方之後

國初有諱英者仕于上海之稅課局因家焉公之
五世祖也大父諱昭以長子中丞公瑜先任衢州
知府封如其官父琛以中丞有軍功授金山衛指
揮使後以子貴贈刑部主事娶徐氏趙氏徐贈安

人趙生公封太安人公諱錦字士罔別號龍江自
少以文學名弘治乙卯年二十有一領南畿高薦
明年遂登進士時 詔脩 大明會典吏部擇進
士之有文學者令採撫諸司事例以付史館公實
與焉書成而稱疾告歸家居養親者數年不忍別
去厥考強之始往赴選先是同與史事者皆得京
秩公恥援例自陳仍以常格授東明縣尹其爲治
守已執法以安民爲本凡有興革民皆便之時議
者以河患不息 奏開賈魯河以洩水事下工部
檄北畿兩淮河南山東諸巡撫會勘特委公相度

形勢公言此河淤塞已百餘年延袤至數百里開鑿必動衆億萬恐所費不貲而功必無成矧前元以開河致亂尤爲可慮莫若因時處宜漸爲隄防以遏其勢可也巡撫諸公據其議以聞事竟寢監司嘗署其考曰學優才敏政舉民安人以爲確論丁卯召爲兵科給事中勅理廣東鹺政稽積逋百萬引凡小民所負悉爲蠲除官司有侵匿者皆効實於法時逆瑾擅權凡奉使回必納賂往見公獨否瑾銜之撫拾無所得乃以巡歷不遍謫判深州甫兩月而瑾誅遂遷南京工部主事會詔脩

孝陵中官董其役多所需索公裁之以法所省過半而功倍之蘆洲爲本部所轄公嘗司其事一洗宿弊輿論帖然壬申遷南京刑部員外郎尋丁外艱服除入朝爲刑部郎中有獄囚積年不決察其可矜狀爲奏請出之嘗慮囚湖廣平反殆三百人咸服其平恕丁丑擢江西按察副使勅董學政嚴條約肅矩範而校藝悉當士子莫不心服已卯會宸濠作亂公被囚王府及宸濠舉兵離省守者稍懈公密召役夫奮鬪而出乃安集居民激以大義令悉捕逆黨之守城者城中晏然又以兵

力寡弱恐不能支適都憲王公守仁駐兵鄰境乃遣人馳請入城與之共守王公旣至嘉公之功欲薦于朝其官屬有領兵者所統皆往年招降羣盜專以攻劫爲事焚燒民居五千餘家死者不可勝計領兵者恐以妄殺獲罪乃妄言麾下萬銳臨陣所殺以匿罪冒功公之功竟爲所掩反以失守落職知者咸爲之太息而公不自辯也迨今上卽位之六年究覈當時功罪始白其事乃賜復章服尋奉詔例致仕後以子燾爲中書舍人推封中憲大夫蓋仍其舊秩也公爲人篤於孝友遇

族黨咸有恩意雖甚老精力不衰對客談論疊疊不倦平生以清慎自守尤好拯人之難守令每詢民間利病必悉心以告鄉人多受其惠居常好學不已凡諸子百家之書靡不周覽爲文章莊重有法後進以爲楷範所著有文集若干卷及上海大名二志龍江夢餘錄諸書頃避倭寇之亂寓居華亭之石湖塘以嘉靖三十三年四月十有三日整襟危坐而逝其生則成化乙未十二月二十八日也享年八十配陸氏封恭人爲宗伯文裕公之女弟有賢行先卒子男三長卽壻娶朱氏贈孺人繼

談氏封如之次爛次贊俱太學生爛娶郁氏贊娶
顧氏盤爛皆先卒女四適王應辰趙國沈應魁談
萬卷應辰國俱太學生沈氏談氏女皆出側室何
氏孫男五長繼榮太學生娶陳氏次繼道娶朱繼
勳娶顧繼陞娶陸繼茂聘郁女三適庠生陸燠鄉
進士趙灼及劉文麟贊等將以甲寅年季冬廿又
四日葬公於廟涇之原乃持奉化尹徐君獻忠所
爲狀請予銘墓惟予與公三試皆同舉迄今六十
年矣且家居鄰郡相知實深而謝事以來杜門日
久不能效趙康靖之訪歐陽文忠每以自愧予昔

年八十時公嘗製詞爲壽今公壽亦躋八十予固將往賀之而誕辰未至竟不及待方爲之痛惜不已銘又安可辭哉銘曰

昔在先朝逆藩構亂誰其定之唐公爲先身被拘囚奮挺而出乃集居民忠義是率糾我義士俘彼逆徒金湯以固禍亂斯除孰掩其功反加之罪公不自辯怡然去位今皇繼統公道始彰青蠅一洗仍畀服章亦有令子官居京秩爰沐封恩綸音載錫繫公平生政績孔多中道而尼其如命何八十其年厥壽斯邁子姓森森靡福不備公雖逝

矣令聞如新爰最其迹以示後人

龍江集目錄

第一卷

詩

題聽琴圖

題韓湘子像

送曹侍御赴南臺

贈華亭沈虛明

題四皓奕棋圖

題老子出關圖爲玉洲作

清河舟中得夜明木

題黃鶴樓次西涯少師韻寄鳳山中丞

發舟錢塘江

拜岳武穆祠二首

奉天門早朝

晚出左掖

禁直

白沙晚渡

賞梅三首

飲總鎮南園

書韶州察院壁

皂口舟中翫月

小溪曉行

東明郊行

重陽賜燕

月殿秋香

柳燕

蓮花

貴溪舟中

九日過釣臺

秋夜無題

送王僉憲進表便道省親

嶺南察院和郁道長韻

送湖臬高僉憲陞陝西副憲

拜徐孺子墓

近山

玉泉上人

初至湖南贈張汝禎道長

慶祖道中

壽馮雪竹

張石川副郎塚廬巢燕二首

次文峰先生秋興二首

望杜子美草堂

過顏魯公祠

楚雄拜武侯祠

過滇南思武侯擒孟獲有感

和大司馬彭幸菴過淮陰祠韻

蒲泉

題滕王閣圖

題便面小景

賀宣城伯衛公六十

東雲

西蘆

送顧龍海春試

雨中哭子儼

贈浦小癡

挽謝楓林先生

送顧侍御北上

尋仙卷爲陳相士作

登大伾山

贈星士周野航

度梅嶺

慰石郡伯喪子

讀元史誅鉄木迭兒事

省署同僚邀登城南諸山次韻

芥

送江臬林憲長陞河南方伯

白蓮

送劉中丞征嶺東

壽儼山先生

西林

和王僉憲潯陽道中之作

書南康山中公館

使還迂瑾謫判深州

送師員外陞江西僉憲

送張侍御使節還朝

市隱

石津

溪隱

送馬明府之京

夢歸

對長垣公署新竹

途中卽事

對鏡見白髭

喜雨

月湖

舟次邳州

竹亭

送朱純齋應召

拜文山先生祠

第二卷

序

遺槐先生詩集序

玉洲先生文集序

贈都憲劉公巡撫延綏序

中丞彭公遺愛詩序

海珠贈別詩序

蠖菴疏稿序

文裕公續集序

大老編序

滄浪櫂歌敘

第三卷

序

賀憲使復菴先生任公榮擢序

贈郡伯兩城斬先生之任吉安序

臥龍文集序

重刊褚氏遺書序

左傳要語序

代作

贈憲伯東江牟先生赴任序

賀八峰先生旌獎序

賀望川先生旌獎序

贈右山喻先生考績登朝序

第四卷

序

贈一松先生治海功成序

賀勅封顧母李孺人序

賀少府周侯獎勵序

日新先生挽詩序

送西峰黃先生擢教京府序

張氏宗譜序

褚氏遺書序

黎陽王太傅詩選序

代作

王太傅詩選後序

俯碧詩序

重刊靜芳亭摘稿序

贈司幕鄧君入覲序

第五卷

碑記

鄭侯去思碑

新建衛公仲由墓祠記

吉安府學新修記

張侯德政碑

第六卷

碑記

新建萬年縣儒學記

中洲方先生去思碑

馮侯去思碑

第七卷

碑記

重建新豐縣廟學記

東明縣新建預備倉記

思貽記

曹侯德政碑

開封府清軍公署之記

古溪記

第八卷

墓誌銘

江西右叅議芋西儲公墓誌銘

四川左布政使西津沈公墓誌銘

旌德知縣懶樵孫公墓誌銘

朱母張氏墓誌銘

第九卷

墓誌銘

顧景高先生暨配王秦二孺人墓誌銘

誥贈宜人喬氏墓誌銘

素菴陸公孺人張氏合葬墓誌銘

工部司務士謙唐公墓誌銘

士重唐君墓誌銘

唐孺人徐氏墓誌銘

亡姪世學唐君墓誌銘

亡姪唐世載夫婦合葬墓誌銘

亡兒唐儼墓誌銘

季子重壽權厝誌銘

第十卷

墓誌銘

亡女天水郡宗婦墓誌銘

沈孺人唐氏墓誌銘

第十一卷

墓誌銘

太學生守約陸君墓誌銘

東臯沈公暨配譚孺人墓誌銘

劉母孺人曹氏墓誌銘

北山陳公墓誌銘

墓表

處士可閒施公墓表

誄

顧令人劉氏誄

第十二卷

行狀

詹事府詹事兼翰林學士儼山陸公行狀

第十三卷

行狀

山東按察司副使遺槐談公行狀

封廣西按察司僉事願菴潘公行狀

亡兄浙江布政司都事恕齋行狀

第十四卷

禱著

祈雨祭城隍文

張龍山都諫進士巾服像贊

少宗伯賓山張公像贊

栢舟頌

忠經引

夢餘錄引

鄭氏家規引

古今說海引

書大名志後

書喬氏族譜

跋王太傅詩選

歸朝歡 賀郡尊述齋何公擢河南憲副

慶春澤 賀兵憲敖蒙泉先生 勅獎

慶春澤 贈潛厓李先生署篆上海

龍江集卷之一

雲間 唐錦 士綱

詩

題聽琴圖

紙牕露濕金徽冷何處轆轤響銀井須臾松風拂
座來夜烏啼碎梅花影柴扉寂寂春自遲流水高
山入夢思賞音無地尋知己欲買黃金鑄子期

題韓湘子像

昌黎千載士虎踞白玉堂毛錐三寸奪造化抉剔
海岳無晶光此事古來神鬼忌真宰泣訴令投荒

頃刻花。逡巡酒。藍關雪花大於手。永視馬蹄凍欲僵。等閒笑破山人口。驅烟霧。御氤氲。仙耶非耶且勿論。靜裏悠悠誰似君。

送曹侍御赴南臺

錦溪清冽名吳東。百年孕秀生人龍。文章力欲追古作。一第豈足論君功。世俗紛紛薄外補。君領縣檄心無忤。丈夫制行自奇特。肯與兒女爭青紅。廉勤兩字立基址。濟以方略皆旁通。沙民競說好官長。嘆息杜母今遭逢。日長無事捲簾坐。堦下草色春蒙茸。使者上書報天子。旌此循吏償其庸。

詔書召置紀綱府時論翕然稱至公捨豺問狸士
所耻須使虎狼悲技窮稜稜霜筆貴嚴簡指摘細
瑣非豪雄王素鵲桓典驄古來御史要孤峻亭亭
碧漢凌長松 聖明不世安忍負佇看臺閣欽高
風

贈華亭沈虛明

虛明醫術傳長桑上池神水親曾嘗望形洞見臟
與腑豈但診切推精詳靈樞素難總貫串逢人肯
誦聲琅琅出入古方不拘泥往往變化窮幽茫相
機制勝有神用老將旗鼓疇能當五運六氣在指

掌何物疾豎能張皇保嬰活幼著奇績三吳千里
名傳揚祈求邀請日無曠門外羅立森成行平生
嗜義不嗜利溫然襟抱如春陽古來名醫多得道
奉耽思邈尤彰彰况君生來有仙骨功行應已書
金堂傳聞 明詔搜隱逸奇寶恐難終閔藏節宜
元化助燮理四海熙熙同壽康

題四皓奕棋圖

鮑魚風腥蛇走陸海底驚蛟翻地軸夜深密約笑
圯橋白日楸枰自空谷芝苗濕雨雲朶香石隨作
羹霜粉熟鴈行虎穴信意排酣戰何曾勞寸鏃定

霸秦強傳觸蠻誰呂誰劉總蕉鹿平生懶拜溺冠
翁肯向兒曹效驅逐可憐廣術起畱侯漢室君臣
莫能燭知心仗賴鐵仙歌袞鉞森嚴聞者服四老
九泉應撫掌千載青編洗遺惡

題老子出關圖爲玉洲作

柱下老史道德宗變化恍惚人之龍前身知是廣
成子後世或云河上公髭髯兩鬢白於雪神氣內
守顏如童憫此濁世懶着脚遠駕青牛來自東函
關義義高百尺關頭紫氣連蒼穹當時抱關者誰
予能於塵路窺仙踪天書雲篆啓玄秘包括元氣

開鴻濛流沙西去幾千載東海今朝復見翁蚤歲
聲名擅場屋詞鋒筆陣誇豪雄晚耽冲素謝華寵
肯爲鍾鼎勞形容閉門默契五千字一一星斗羅
心胸冥神塞兌得妙理蹴踏造化鞭雷風指點蓬
瀛笑清淺天長地久無終窮

青河舟中得夜明木

有木有木名夜明閃爍睡眼流光晶
熒熒床頭久不滅魂夢展轉增猜驚
初疑紅爐熾楫杌忽訝紗幕團丹螢
書空咄咄稱恠事豈有鬼物相纏縈
形求理究總莫測俄聞鷄唱天將明
披衣亟起細辨

認朽株三寸牕間橫摩挲頗作茵葦氣把玩久覺
魚龍腥吁嗟瑣物真可笑暫爾乘昏與燭爭

題黃鶴樓次西涯少師韻寄鳳山中丞

扁舟鄂渚連宵泊一樽聊伴城樓鶴月光照人如
鏡明水色涵空更澄廓樓背小亭白石鑿裂處似
有藤蘿絡欲將勝致付毛生掌中酒杯且權閣凌
晨歷覽週遭峰村歌野曲鳴商宮官清萬口託奇
遇民隱九重偏易通戰馬千羣臥芳草山川二百
皆春風瀕江小歎亦偶爾全活正賴青州翁中臺
大夫南國彥胸中石渠有其半經綸餘滴灑秋風

流水行雲看染翰名樓秀句兩爭雄千載鶴詩今
再見憑欄獨抱廟堂憂舉頭嬾識江山面酒酣携
笛傍梅花吹徹楚雲飛碎練不須高語驚星辰聲
名久已登霄漢

發舟錢塘江

江流限封疆吳越判彼此伐鼓發樓船潮聲吼犀
兕朝潮暮潮中千山萬山裏朝潮纔落暮潮來一
山未了一山起潮落潮來如送迎山雨山晴互青
紫冒險陟華咄韓公夜半航海憶蘇子謾矜奇絕
冠平生未暇悔狂頻咋指諫垣新命感遭逢簡任

叮嚀勞 敕旨嶺南醴政父蠹弛剔扶爬搔自應
理公餘未必妨游觀珠海羅浮供筆底歸來無術
裨廟謨山水新圖三百紙

拜岳武穆祠二首

湖草春寒綠未回荒涼石獸使人哀碧山高塚埋
冤骨青棘幽魂泣雋才江北壺漿迎上將天邊星
象圻中台貞祠況近錢塘路又見潮聲捲怒雷
幾度長歌復短吟冷風吹淚欲沾襟一杯冤土千
年血五國荒城萬里心慘澹丹青生氣凜陰森松
檜暝雲深思陵金盃知何處斷髮荒趺已莫尋

奉天門早朝

曉風輕度鳳樓鐘黃幄低垂護 聖容天上九關
嚴虎豹望中雙玉踴蛟龍香凝寶蓋爐烟細星綴
紋綃扇影重鞭罷兩班齊北拱仗前牽過五花驄
晚出左掖

彩毫批鳳絳霜濃袖捧驪珠下九重宮柳撼風飛
瘦碧香雲擁座罩輕紅堦前武士橫金虎檻外寒
泉噴玉龍緩步掖垣歸漸暝 君王猶御未央宮
禁直

諫書無補媿清班青瑣雲深白晝閒袍袖香溫初

對罷詔黃墨濕午塗還樂聲奏鳳知天近闕影移
龍覺晷慳隱几偶然成小寐萊衣時舞夢魂間

白沙晚渡

作音微冷朝朝雨催帆日日風水清山露趾雲重月
沉容北闕青天上高堂白髮中秋懷正無賴嘹唳
數聲鴻

賞梅三首

酷愛幽芳盡日看凍雲烘透粉痕乾吟邊風勁愁
聞角折處枝斜恐礙冠澹拂湘簾橫月影薄裁吳
苧護春寒含情莫怨相知晚欲補離騷似已難

翠羽聲沉月向昏
紙牕幽夢鎖香魂
虬身染霧鱗
猶濕懶髓塗霜玉未溫
忍凍欲償詩客債
先春應識化工恩
深山自笑無人問
寂寂踈籬半掩門
臨風脈脈度寒朝
誰與花神破寂寥
碧蘚封香春尚淺
石池浸影雪初消
枝藏病鶴如憐瘦
瓣落深宮欲鬪嬌
遙想西湖明月夜
幾人携酒踏溪橋

飲總鎮南園

海天空闊有仙鄉
烟鎖簾櫳鶴夢長
黃菊照屏霜影瘦
紫蒲穿石水痕香
枰開虎穴棋爭險
匣迸龍精劍吐鐔
醉裏是誰歌白雪
繞梁清響尚悠揚

書韶州察院壁

嶺南暮冬如暮春鳥聲百變殊可人上堦芳草碧
烟細入檻芭蕉羅扇新芙蓉灣頭花更好暖日晴
波漁艇小忽憶江南開畫船錦雲十里湖山曉

皂口舟中翫月

船頭坐着月升空兩岸青山落鏡中千里懷人幽
夢遠一樽對客賞心同誰家玉笛風吹到此夜銀
河路可通莫信更闌辭酩酊明朝萍梗又西東

小溪曉行

望中漠漠總烟嵐風土殊方惜未諳詩爲愁多添

日課酒因性懶廢朝酣鳥爭棟子和霜墮僧拾松
枝帶葉擔漠漠江雲飛漸杳滿前新景向誰談

東明郊行

巡行入村落觸眼盡荒涼掃葉供晨爨
陽敗茅遮破屋折葦障頽墻欲拯慙無策誰云令
尹良

重陽 賜燕

鵠立仙班曉露寒宴傳 天語下雲端糕聯紅玉
炊新棗酒泛黃封出大官九奏鳳韶聲隱隱雙開
雉尾影團團小臣何幸沾 恩寵默倚西風媿素

餐

月殿秋香

銀闕沉沉鎖嫩涼，滿庭香雪綴嬌黃。幾人礪斧誇
吳健，此夜登樓笑庾狂。袖裏高枝秋弄色，眼中清
影玉生光。酒酣記得歸時路，鶴背西風碧漢長。

柳燕

芹泥御罷東風軟，舞趁綠陰嬌。似嬾飛來新壘，立
多時，說盡閒愁春不管。

蓮花

薰風池館午雲涼，紅玉層層沁水香。疑是西施醉

歸後笑將微露洗殘粧

貴溪舟中

山光歸興兩爭濃
醉到蓬窗任晚風
文印手提還聖主
釣竿心許作漁翁
藥籠報國參苓滿
海嶠藏名鳥鵲空
唯有白雲堪把玩
不成雷雨不從龍

九日過釣臺

滿蓬風雨載秋懷
歸夢偏酣舊釣臺
世路悠悠那可戀
天心落落總難猜
旅中佳節歡娛減
鏡裏清霜歲月催
遙憶紫芝峰下菊
絨香應待主人回

秋夜無題

湘簾籠月夜沉沉立遍闌干思轉深露冷芙蓉嬌
欲瘦霜嚴楊柳脆難禁淚憐銀燭和心剪情寄青
鸞托夢尋擬就君平卜歸耗小釵拚取鳳頭金

送王僉憲進表便道省親

寶鷄薰風破曉飛白雲紅霧夢依依九重殿陛
瞻龍袞千里庭闈望綵衣湛露香濃銀燭夜玉卮
春暖草堂暉消埃欲補乾坤大不似相如此日歸
嶺南察院和郁道長韻

嘆息西風滯葛衣幾多情事與心違白雲萬里天
如寄黃葉千林客未歸鴈足有時憑附信鷗盟何

日許忘機清高偏愛陶彭澤三徑何曾着是非

送湖臬高僉憲陞陝西副憲

共是當年墨綬郎曾於東郡識甘棠題詩尚憶忙
中寄遺舄猶傳去後香瑣闥風聲誇九鼎霜臺月
色徧三相應知此去雲霄近只恐湖山隔渺茫

拜徐孺子墓

五里城南墓千秋物外心古今懷去就山水繫高
深鳳遠梧空老亭荒竹自陰清風時復至吟罷一
披襟

近山

上得幽居傍翠屏，
澗泉偏愛枕邊聽。
曉來嵐氣衝簾入，
濕透床頭相鶴經。

玉泉上人

泉水清於玉，
禪心淨似泉。
傳聞玉泉水，
曾吐鉢中蓮。

初至湖南贈張汝楨道長

黃葉滄洲動曉霜，
埋輪風采識張綱。
楚山雨過秋如洗，
夢澤烟消水亦香。
北獻皂囊驚絡繹，
南飛孤隼看翺翔。
曾聞太史傳新報，
執法連霄倍有光。

慶祖道中

擾擾黃塵道路長，閒邊巢許笑人忙。
軒乘野鶴元非性，服被林麋祇發狂。
煮石作羹山骨嫩，掬泉洗耳水花香。
追思往事仙凡隔，獨立郵亭數鴈行。

壽馮雪竹

雪竹先生抱古心，清虛不受一塵侵。
浮光映月明千里，直節凌雲聳百尋。
靜掩袁扉高臥穩，深開蔣徑俗緣沉。
謾誇歲晚呈佳瑞，更喜平安報好音。

張石川副郎塚廬巢燕二首

華表雲深鶴影孤，蕭蕭風樹集啼烏。
世間物性偏相感，廬畔新巢燕引雛。

墓草離離晚露收
血痕點點滲松楸
烏衣亦解憐
純孝時傍苦廬語不休

次文峰先生秋興二首

玉露新涼秋滿林
曉風穿戶氣蕭森
寫懷詩句傳梧葉
遣興壺觴傍竹陰
夢短爲懸經國慮
年豐偏愜濟時心
授衣節候知將近
昨日紗帷透遠砧
暮雲風急鴈行斜
客裏逢秋感歲華
落葉響隨窗外雨
枯枝飄作水中槎
誰家斷續敲砧杵
何處喧嘈競鼓茄
賴有清香能慰藉
石欄巖桂正開花

望杜子美草堂

浣花十築景偏幽勝壓西南十二州千載尚嗤嚴
子隘一生長抱杞人憂乾坤逸氣吞仙李風雅餘
音到赤劉此日馬前聞杜宇不禁清淚灑江流

過顏魯公祠

野鹿啣花禍已胎漁陽鼙鼓忽然來奔降滿地千
官散捍禦唯公一壘開赴死不辭將國命臨危真
見濟時才仙家附會云尸解此事荒唐我尚猜

楚雄拜武侯祠

策馬龍岡路轉西茂林修竹映棖題帳前雲傍爐
烟起簷外風疑石馬嘶長恨袁曹真虺豕誰知陸

呂亦鯨鯢堂堂兩表扶忠義日月光高泰華低

過滇南思武侯擒孟獲有感

萬里滇池獨駐軍深驅那惜瘴如雲天威薄試爭
輸欸將略非長亦妄云才大豈徒不十倍運窮聊
爾國三分忠魂不逐秋風散應化長虹掛夕暉

和大司馬彭幸菴過淮陰祠韻

功名酣處易生疑大將新壇築禍基徒悵冥鴻高
颺日可憐走狗就烹時草腥長樂鳴妖雉月暗淮
陰怨逆豨頗訝步庭當日事仰天私語是誰知

蒲泉

葛陽性通靈泉水號清泚延年與樂饑均爲隱者
喜金色映容顏玉韻雜宮徵飽供韓終餐淨洗許
由耳悠悠千載間偶爾得知已睨彼名利徒何殊
附羶蟻

題滕王閣圖

千尺長松百尺樓棟雲簾雨照清秋
前驚影雲俱落檻外天光水共流
隔岸漁舟開野景塞衢冠蓋擁諸侯
文章盡說三王好一片韓碑映斗牛

題便面小景

長日深山坐小年松陰竹影洞中天
世間縱有風

和兩那得閒愁到耳邊

賀宣城伯衛公六十

主組相傳世澤新
堂堂勲業照麒麟
臨軒授鉞頻承寵
橫槊吟詩捷有神
六表正當全盛日
千鐘偏稱未衰身
公餘更羨心如水
不雜歌聲與舞塵

東雲

英英一朶伴朝暉
影掛扶桑鶴未歸
秋水虛明初擘絮
春風淡蕩不成衣
長疑青帝開簾幙
每與幽人護釣磯
只恐從龍行雨去
故山清夢亦應稀

西蘆

水西叢葦隱君家門倚西風散雪花幾度夜深看
鴈集一鈎殘月映寒沙

送顧龍海春試

龍樓春曉御香飄獻策彤墀總俊髦此日臚傳誰
第一宋家兄弟有祁郊

雨中哭子儼

幾度長吟復短吁食牛汗血總成虛招魂夜拂新
封土閣淚時翻舊讀書天地有愁誰似我海門無
色月沉珠兒今何地爲才鬼却恠秋來入夢疎

贈浦小痴

莫道生來性不靈，耻將巧慧役心兵。
虎頭三絕君今幾，晉帖唐詩總擅名。

挽謝楓林先生

每因霜檜想華標，此夜風雷忽已凋。
三匝繞枝烏血盡，百年浮景燭光消。
床頭舊誥春常在，江上孤舟夢恐遙。
回首楓林雲影黑，楚歌聲斷不成招。

送顧侍御北上

玉署文章獨老蒼，囊封猶染墨花香。
風雲氣暖春偏早，松菊盟寒徑未荒。
書卷本宜閒裏著，詩篇多向別時忙。
故人亦有游仙夢，欲附鵬翰萬里翔。

尋仙卷爲陳相士作

尋仙道人江海彥三島十洲渾走徧歸來自覺術
有神隔牖能將色絲辨酒酣耳熱逞談鋒對人信
口分猪龍雙瞳炯炯敵秋月世間安用窺青銅

登大伾山

肩輿衝曉作山遊黃葉迎風面面秋過眼飛雲應
我笑隔林啼鳥向人畱石堦竹迸苔痕破玉井龍
歸雨氣收謾檢禹書尋往迹茫茫何處是江流

贈星士周野航

小艇年年破浪飛秋風銀漢夢依稀主人元是乘

槎客載得機邊一石歸

度梅嶺

誰云度嶺卽炎方十月山橋滿屐霜
蕉躡故衣羞戀綠菊畱殘朶欲飛
黃鸝鳴有意憐行客茅屋無烟鎖
夕陽此日觀風增感慨馬蹄隨處有荒涼

慰石郡伯喪子

天上游龍不受羈世間英物數偏奇
暮鴉行處窓猶濕曉蝶飛來夢欲迷
香冷砌蘭霜朶脆影踈庭桂月痕歌
無端最是銷魂處細雨危闌獨倚時

讀元史誅鉄木迭兒事

公論誰將付等閒主張猶在是非間玉津佗胃雖
回首珠海胡銓未賜環投鼠何人知漢策效鷄有
客過秦關偶從往事窺天道管豹無由見一班

省署同僚邀登城南諸山次韻

路入烟蘿迥山迴谷勢偏松深雲護鶴石秀玉生
蓮長笑驚天近奇觀愛瀑懸隔林聞犬吠疑隱又
疑仙

芥

雨過春畦菜甲榮芥臺嫩茁紫檀莖齋厨添得新
風味頓覺人間肉食輕

送江臬林憲長陞河南方伯

清波綠樹曉烟輕
錦纜牙檣畫裏行
雨過徐亭餘惠澤
風來梁苑動歡聲
紫垣光彩瞻星座
碧漢孤高仰月卿
只恐九重思賈傅
汴河堤畔卽雲程

白蓮

上苑新開碧玉池
千層翠蓋覆清漪
錦雲朵朵含香露
疑是西施浴罷時

送劉中丞征嶺東

緩帶輕裘意自閑
指麾白羽笑談間
五兵妙選霜飛盡
萬騎長驅卯壓山
掌上風雲諸葛陣
眼中勲

業狄青關歸來好刻磨崖頌劍血淋漓字恐殷

壽儼山先生

補天餘剩萬瓊瑰粧點烟雲費剪裁莫訝太湖新
鑿出應從天竺舊飛來玉舒仙掌當窓倚金削芙
蓉傍浦開巖畔况多千歲藥何須泛海覓蓬萊

西林

高樹踈陰送晚暉桑榆路近鶴先歸披襟偏愛秋
風爽碧葉滿山雲亂飛

和王僉憲潯陽道中之作

驅車朝復暮古道正斜陽遠岫烟凝紫平曠麥染

黃征鴻飛有伴候吏立成行昨夜招提夢依稀入
未央

書南康山中公館

山館題詩已十年重來風景更淒然黃蒿滿地秋
無主白水迷村冷浸烟烽火四郊頻送警江湖一
念獨相牽翻思獻納當時曠策馬斜曛媿負暄
使還迂瑾謫判深州

此日遷居易狂談忤趙高猶堪抄藥案不用註離
騷聖王明如舜權閹黠似孫智囊還自戮天網
詎容逃

送師負外陞江西僉憲

青瑣追隨記昔年紅雲近捧御床前江湖舊跡
憐萍散省署新銜喜壁聯許國久懷經世略觀風
應有感時篇明朝相憶登樓望烟樹微茫接楚天
送張侍御使節還朝

攬轡江南此日還薊雲燕樹望中山恩波浩渺西
湖外風采飛揚北斗間仙仗曉趨霜氣肅囊封時
檢墨花班欲憑餘興與盟詩酒國論關心恐未閒

市隱

滿城車馬任追攀靜臥心閒夢亦閒門外紅塵三

十丈垂簾如隔萬重山

石津

白玉灘邊藥圃開
渡喧時見客船來
杏花繞岸紅千樹
盡是仙翁手自栽

溪隱

青草扁舟偶繫情
溪翁久已作同盟
釣絲小試垂綸手
酒盞深埋玩世名
浪裏龍門慚舊夢
雨餘蛙鼓戀新聲
年來機事渾忘盡
爲報沙鷗且莫驚

送馬明府之京

萬里天風送羽翰
九重宮闕五雲端
瑣闥新命頒

綸綽練水餘芳襲蕙蘭經濟文章金薤重廉明聲
價玉壺寒從來賢輔多循令漢簡唐編取次看

夢歸

十載江門睡正牢偶沾塵土落蓬蒿勘經評史權
非小品草題花興亦豪躁出已慙猿鶴怨夢歸無
奈水雲遙天涯高士須珍重莫放書聲出樹梢

對長垣公署新竹

栢府清虛竹迸芽春風先到此君家錦裯未脫嫌
霜重玉版初叅怯霧遶大嚼謾吟蘇氏鶴頻來莫
笑子猷車明年看取凌雲節百尺珊瑚映碧紗

途中卽事

十載長安夢始醒
武城弦誦沸新聲
文章謾入宗工眼
案牘何辭俗吏名
楊柳着霜金縷脆
木綿烘日粉雲輕
故園謾有心如火
未了平生報國情

對鏡見白髭

拭拂菱花照病姿
曉霜何事犯吟髭
祗緣色養關幽思
不爲冥搜覓好詞
閑笑素絲偏易染
靜憐白壁自難緇
弄人伎倆從今悟
明日扁舟已是遲

喜雨

夢回午枕篆烟清
蕭颯庭槐忽有聲
淺沼添波新

綠漲殘葵落朵小紅輕鵲衣披濕投林急電幟搖
光奪眼明樂甚自將盃斚洗安排詩酒迂西成

月湖

萬頃玻璃一鏡浮玉蟾分影印寒流清輝寂寂魚
龍夜白露瀼瀼菡萏秋風送笛聲漁艇外鴈驚人
語蓼灘頭踈狂賀老偏多興欲買扁舟釣共遊

舟次邳州

柳色槐陰潑眼濃濁流千里捲長風奔馳烈火疲
漕卒泛逐浮萍笑宦蹤山勢迎人蹲虎豹月鉤入
水泣蛟龍小臣欲效華封祝先草河清頌一通

竹亭

懶將俗事擾幽懷
遶屋琅玕手自栽
碎影點窓秋月滿
清聲入座午風來
門深唯許王猷造
徑僻曾看蔣詡開
轉眼碧梢抽紫實
傍雲須築鳳凰臺

送朱純齋應召

萬里風雲朝發初
九峰天朗月光虛
烟花色照鳴琴室
冰雪聲騰薦鶚書
鳬跡已登雙鳳闕
鵷班正傍六龍車
論思獻納男兒事
莫惜批鱗與引裾

拜文山先生祠

灑淚登壇一劍雄
義旗雲合仗孤忠
歷探虎穴身

忘死共汎鯨波計已窮萬里遊魂燕月冷二龍歸
海宋晁終狀元宰相公無忝要表先朝養士功

龍江集卷之一